



IJODIY PARVOZ

2022-yil yanvar № 1 (105) dsmi.uz nashriyot@dsmi.uz ijodiyparvozgazetasi



Ibrohim YO'LDOSHEV,
O'zbekiston davlat san'at va madaniyat instituti rektori,
filologiya fanlari doktori, professor

Tarix zarvaraqlarida qolgan 2021-yilni kuzatib, Yangi – 2022 yilni kutib oldik. O'tgan yil davomida barcha sohalar faoliyatiga nazar tashlaydigan bo'lsak, mamnuniyat bilan aytish lozimki, amalga oshirilayotgan tub islohotlarning asosiy maqsadi mamlakatimizda oliy qadriyat hisoblanmish inson manfaatlarining to'la ro'yobga chiqarilishiga qaratildi. Yangi O'zbekistonni barpo etish, Uchinchi Renessans poydevorini mustahkamlash yo'lida dadil qadamlar tashlandi. O'zbekistonning xalqaro mavqei yanada yuksaldi. Yurtdoshlarimiz ong-tafakkuri o'zgarib, xalqimizning xohish-istaklari, orzu-umidlari ro'yobga chiqqan holda, hayotimizda yorqin iz qoldirdi. Eng muhimi, bu yangilanishlarni odamlar o'z hayotida his etdi. Shu jumladan, O'zbekiston davlat san'at va madaniyat institutida ham poyoniga yetgan yilda barcha sohalarida kechgan yangilanish, yuksalish jarayonlariga hamohang ish olib borildi. Harakatlar strategiyasini 2021-yilda amalga oshirishga oid davlat dasturida belgilangan vazifalar bajarilishiga muayyan hissa qo'shishga erishildi.

2022-YILDAGI VAZIFALARIMIZ

Barchamizga ma'lumki, O'zbekiston Respublikasi Konstitutsiyasi qabul qilinganining 29 yilligi munosabati bilan Prezidentimizning O'zbekiston xalqiga yo'llagan bayram tabrigida ham mamlakatimizda amalga oshiriladigan muhim vazifalar belgilandi. Prezidentimizning O'zbekiston xalqiga yo'llagan bayram tabrigida aytilganidek, Yangi O'zbekistonni barpo etish bo'yicha amalga oshirilgan keng ko'lamli islohotlar natijasida o'tgan qisqa davrda jamiyatimizning siyosiy-huquqiy, ijtimoiy-iqtisodiy, madaniy-ma'rifiy manzarasi butunlay o'zgardi. Erkinlik va ochiqlik, qonun ustuvorligi, jahon hamjamiyati bilan o'zaro manfaatli hamkorlik davlatimiz siyosatining asosiy yo'nalishiga aylandi.

Adolatlilik va xalqparvar davlat qurish yo'lida muhim vazifalarni amalga oshirish uchun yangi konstitutsiyaviy makon va mustahkam qonunchilik bazasi kerak bo'ladi. "Asosiy qonunimizni jamiyatdagi bugungi real voqeelikka, shiddatli islohotlarimiz mantig'iga moslashtirish, Yangi O'zbekiston taraqqiyot strategiyasi uchun mustahkam huquqiy poydevor yaratish muhim vazifaga aylanmoqda", – deya ta'kidlagan Prezidentimiz o'z tabrigida.

Yangi O'zbekiston g'oyasi el-yurtimizning ulkan intilish va irodasi bilan umumxalq harakatiga aylanmoqda. Barchamiz ana shu ulug' maqsad yo'lida yanada jipslashib, g'ayrat-shijoat va mas'uliyat bilan fidokorona mehnat qilsak, ko'zlagan yuksak marralarimizga albatta yetamiz, – deyiladi Prezidentimiz tabrigida.

Ilgari amal qilib kelingan "davlat – jamiyat – inson" tamoyilini "inson – jamiyat – davlat" deb o'zgartirish, uni milliy qonunchiligimiz va huquqiy amaliyotimizda mustahkamlash zarurligi xalqimizni, shu jumladan, ta'lim dargohimizdagi pedagoglar hamda talabalarni ham behad quvontirib yubordi.

Demak, mamlakatimizda inson manfaatlarini oliy qadriyat darajasiga ko'tarildi. Xalqning dardini eshitish, ularning muammolarini hal etishda, shak-shubhasiz, kutilgan yuksak natijalarga erishilmoqda. Yurtimizda huquqiy demokratik va ochiq fuqarolik jamiyatini qurish, xalqimiz uchun obod va farovon hayot barpo etish yo'lida

juda muhim ishlar bajarilmoqda. Bu esa o'z navbatida, institutimizning oldida ham juda muhim ishlar turganidan dalolat beradi.

Qolaversa, Yangi yil arafasida davlatimiz rahbari tomonidan yangi 2022-yilni O'zbekistonda "Inson qadrini ulug'lash va faol mahalla yili" deb e'lon qilindi. Yangi O'zbekistonda "Davlat–inson uchun" tamoyili asosida inson huquqlarini mustahkamlash, odamlarni rozi qilish islohotlarning ustuvor yo'nalishiga aylandi va bu boradagi sa'y-harakatlar kelgusida ham izchil davom etadi. Ularning nechog'li samarador bo'lishida esa mahalla hal qiluvchi o'rin tutadi. Bu o'zgarish mahallada aholi bilan ishlash mexanizmlarini takomillashtiriyapti.

Shuningdek, joriy yilning 26-yanvar kuni Prezidentimiz raisligida O'zbekistonning 2022–2026-yillarga mo'ljallangan taraqqiyot strategiyasini belgilash hamda uni joriy yilda amalga oshirish masalalari muhokamasi yuzasidan videoselektor yig'ilishi o'tkazildi. Ushbu videoselektor yig'ilishida Prezidentimiz tomonidan ta'kidlanganidek, inson qadri biz uchun qandaydir mavhum, balandparvoz tushuncha emas. Inson qadri deganda, biz, avvalo, har bir fuqaroning tinch va xavfsiz hayot kechirishini, uning fundamental huquq va erkinliklarini ta'minlashni nazarda tutamiz. Inson qadri deganda, biz har bir fuqaro uchun munosib turmush sharoiti va zamonaviy infratuzilma tashkil etishni, malakali tibbiy xizmat ko'rsatish, sifatli ta'lim, ijtimoiy himoya tizimi, sog'lom ekologik muhit yaratib berishni tushunamiz. Bu maqsadga erishish uchun esa dunyodagi noyob demokratik tuzilma bo'lgan mahalla instituti imkoniyatlaridan samarali foydalanish, uning vakolatlarini yanada kengaytirish, pirovard natijada mahallani jamiyatimizning hal qiluvchi bo'g'iniga aylantirish vazifasini o'z oldimizga qo'yamiz. Mahalla tinch bo'lsa, yurt tinch bo'ladi. Mahalla obod bo'lsa, butun mamlakat obod bo'ladi.

Shu o'rinda aytish lozimki, 2021-yilning 8-noyabr kundan boshlab, O'zbekiston davlat san'at va madaniyat instituti tomonidan poytaxtimizdagi mahallalarda "Mahallada duv-duv gap" shiori ostida tizimli ravishda madaniy-ma'rifiy tadbirlar o'tkazildi va 68 ta mahalla fuqarolar yig'inlari hududlarida bayramona kechalar tashkil qilindi.

Ma'naviy-ma'rifiy tadbir

O'zbekiston davlat san'at va madaniyat instituti rahbariyati, professor-o'qituvchilar, dekan va dekan o'rinbosarlari, kafedra mudirlari, ustoz-murabbiylar, tajribali olimlar, amaliyotchilar, tadqiqotchilar ishtirokida bo'lib o'tgan navbatdagi ma'naviy-ma'rifiy uchrashuvda davlatimiz rahbari Shavkat Mirziyoyevning "Yangi O'zbekiston" gazetasiga bergan intervyusi mohiyati hamda ushbu intervyuda belgilangan muhim vazifalar, mamlakatimizda amalga oshiriladigan huquqiy va ijtimoiy o'zgarishlar xususida so'z yuritildi.

Vatan yagonadir

O'zbekiston davlat san'at va madaniyat institutida O'zbekiston Respublikasi Qurolli Kuchlari tashkil etilganligining 30 yilligi hamda 14-yanvar – "Vatan himoyachilari kuni" munosabati bilan "Vatan yagonadir" nomli masofaviy konsert dasturi tashkil etildi. Unda institut rahbariyati, professor-o'qituvchilar, ustoz-murabbiylar, tajribali olimlar, amaliyotchilar, tadqiqotchilar ishtirok etdi.



Tadbir avvalida davlatimiz madhiyasi yangradi. Xalqimizning ulug'vor taronasi yig'ilganlar jo'rovozligida kuylandi.

Konsert dasturi O'zbekiston davlat san'at va madaniyat institutining milliy qo'shiqchilik kafedrasida dotsenti, professor Ahmadjon Dadayev badiiy rahbarligi ostida faoliyat ko'rsatayotgan "Sayqal" hamda O'zbekiston davlat san'at va madaniyat instituti "Cholg'u ijrochiligi" kafedrasida dotsenti, O'zbekiston Respublikasida xizmat ko'rsatgan artist Komiljon Shermatov badiiy rahbarligidagi "Sado" ansambllari vakillarining bir-biridan ajoyib musiqalari bilan boshlandi.

– Jannatmakon mamlakatimizda yashayotgan har bir yigit, o'zbek o'g'loni o'z oilasiga, o'z Vatanga qalqon va himoyachidir, – dedi bayram tadbirida so'z olgan O'zbekiston davlat san'at va madaniyat instituti rektori, filologiya fanlari doktori, professor Ibrohim Yo'ldoshev. – Lekin bukilmash iroda va jasorat namunasini amalda namoyon etib, yurtimiz tinchligi yo'lida xizmat qilayotgan, saflarda qad kerib turgan, yuragida Vatan ishqini jo'sh urgan harbiy xizmatchilarimizning mashaqqatli mehnati juda yuksak e'tibor hamda e'tirofga loyiq ekanligi barchamizga ayon haqiqatdir. Prezidentimiz tomonidan aytilganidek, "Keyingi yillarda "Xalq va armiya – bir tanu bir jondir" degan euzu tamoyil asosida ulkan ishlar amalga oshirilmoqda. Bugungi kunda fuqarolarimiz armiyaning har tomonlama yordami va ko'magini hayotning barcha sohalarida amalda his qilmoqdalar". "Vatan himoyachilari kuni" munosabati bilan o'tkazilayotgan mana shunday tadbirlar yoshlarda Vatanga muhabbat, boy tariximizga, milliy o'zligimizga chuqur hurmatni shakllantirishda, farzandlarimizning har tomonlama barkamol va yetuk insonlar bo'lib voyaga yetishida muhim tarbiyaviy ahamiyatga egadir.

MAHALLA MA'NAVIYAT MASKANI

O'zbek mahallalari jamiyatning o'ziga xos tarbiya o'chog'i, milliy urf-odat, an'ana va qadriyatlar saqqallanadigan, fuqarolarni ezgu maqsad sari birlashtiradigan ma'naviyat maskani sanaladi. O'zaro mehr-oqibat, ahillik va totuvlik, ehtiyojmandlar holidan xabar olish, to'y-tomoshalarni ko'pchilik bilan o'tkazish kabi fazilatlar, avvalo, mahalla muhitida shakllangan. Yurtimiz mahallalarining obod va ko'rkam bo'lishi aholining hamjihatligi, o'zaro mehr-oqibatiga bevosita bog'liq. Zero, ahillik bor joyda osoyishtalik, obodlik, xotirjamlik bo'ladi.

Keyingi yillarda mamlakatimizda mahalla o'zini o'zi boshqarishning muhim institut sifatida jamiyatimizdan mustahkam o'rin egallamoqda. O'zbekiston Respublikasi Prezidentining 2022-yil 19-yanvardagi "Mahallalarda yoshlar bilan ishlash tizimini takomillashtirish chora-tadbirlari to'g'risida"gi Qarori qabul qilindi. Mazkur qarorga asosan maktablardagi yoshlar yetakchilari shtat birliklari qisqartirilib, uning o'rniga respublikadagi har bir mahallada yoshlar yetakchisi lavozimi joriy etildi. Yetakchilar o'ziga birlashtirilgan mahallalarda faoliyatini madaniyat va san'atni targ'ib qilish, sog'lom turmush tarzi va sportni ommalashtirish, axborot texnologiyalaridan samarali foydalanishni tashkil qilish, ma'naviyat va kitobxonlikni targ'ib qilish, vatanparvarlik ruhida tarbiyalash va huquqiy

savodxonlikni oshirish, tadbirkorlik g'oyalarini qo'llab-quvvatlash kabi asosiy yo'nalishlarda amalga oshiradi.

Shuni mamnuyat bilan aytish lozimki, 2021-yilning 19-oktabr kuni davlatimiz rahbari Toshkent shahri aholisi bilan bo'lgan uchrashuvda Madaniyat vazirligi tizimidagi oliy o'quv yurtlari tomonidan poytaxtimiz mahallalarida duv-duv gap bo'ladigan, aholi o'rtasida butunlay yangicha formatdagi madaniy-ma'rifiy tadbirlarni tizimli tashkil etish borasida o'z fikrlarini aytgan edi. Ushbu topshiriq O'zbekiston davlat san'at va madaniyat instituti rahbariyati, professor o'qituvchilar, sohaga aloqador mutaxassislar tomonidan o'tkazilgan muloqotlar jarayonida atroficha ko'rib chiqilib, keng muhokama qilindi. Qatnashchilarning

bildirgan kreativ fikrlari asosida ushbu tadbirlarni o'tkazish bo'yicha alohida konsepsiya ishlab chiqildi. Unga asosan, o'tgan yilning noyabr, dekabr oylari davomida poytaxtimizdagi 67 ta mahallada madaniy-ma'rifiy kechalar tashkil etildi. Ko'lamining kengligi hamda ahamiyati jihatidan muhim bo'lgan ushbu tadbirga juda katta tayyorgarlik ko'rildi. Institut rektori, filologiya fanlari doktori, professor Ibrohim Yo'ldoshev boshchiligidagi o'ziga xos maslahat tusini olgan yig'ilishlar o'tkazilib, tadbirlar davomida kamchiliklarga yo'l qo'ymaslik uqtirildi. Musiqa cholg'ularidan juda mahorat bilan foydalanish zarurligi qayd etildi. Bildirilgan muhim fikrlar o'z navbatida, san'atkorlarni quvontirdi, ruhlantirdi.

